



Trg mladih 8, Zona 1A, drugi sprat-kat / 76100 Brčko distrikt BiH, tel: 049/490-135, web: www.sukobinteresabd.ba, e-mail: info@sukobinteresabd.ba
Трг младих 8, Зона 1А, други спрат / 76100 Брчко дистрикт БиХ, тел: 049/490-135, веб: www.sukobinteresabd.ba, е-пошта: info@sukobinteresabd.ba

Broj: UP-I-KSI-09-06/25
Datum: 07.11.2025. godine

Na osnovu člana 25. stav (1) tačka a) i b), člana 32. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21) i člana 25. Poslovnika o radu Komisije za odlučivanje o sukobu interesa („Službeni glasnik Brčko distrikta Bosne i Hercegovine“, broj: 19/21), Komisija za odlučivanje o sukobu interesa, postupajući po službenoj dužnosti u predmetu utvrđivanja povrede odredaba Zakona o sprečavanju sukoba interesa u institucijama Brčko distrikta Bosne i Hercegovine od strane K.J., iz Brčkog, ulica [REDACTED] člana Upravnog odbora JZU „Zdravstveni centar Brčko“ Brčko distrikta BiH, nosioca javne funkcije, na 134. sjednici, održanoj dana 07.11.2025. godine, donosi

RJEŠENJE

1. UTVRĐUJE SE da je K.J. iz Brčkog, ulica [REDACTED], član Upravnog odbora JZU „Zdravstveni centar Brčko“ Brčko distrikta BiH, nosilac javne funkcije postupio protivno članu 19. i 20. Zakona o sprečavanju sukoba interesa u institucijama Brčko distrikta Bosne i Hercegovine, na način da u Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, podnesenom dana 15.08.2025. godine nije prijavio podatke o pokretnoj imovini supruge, vrijednosti veće od 5.000,00 KM.
2. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, K.J. se shodno članu 39. stav (1) tačka b) navedenog Zakona izriče novčana kazna, i to obustavom dijela isplate neto mjesečne naknade koju nosilac javne funkcije prima za obavljanje javne funkcije u iznosu od 10% (deset posto) neto naknade.

Obrazloženje

K.J. obavlja funkciju člana Upravnog odbora JZU „Zdravstveni centar Brčko“ Brčko distrikta BiH, na osnovu odluke broj: 05-000217/25 od 18.07.2025. godine, te je shodno članu 2. Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije i upisan je u Registar javnih funkcija i nosilaca javnih funkcija.

Članom 22. Poslovnika o radu Komisije za odlučivanje o sukobu interesa propisano je da je nosilac javne funkcije stranka u postupku.

Dana 22.10.2025. godine, Komisija za odlučivanje o sukobu interesa po službenoj dužnosti zaključkom, broj: UP-I-KSI-09-06/25, pokrenula je postupak protiv nosioca javne funkcije K.J. iz Brčkog, člana Upravnog odbora JZU „Zdravstveni centar Brčko“ Brčko distrikta BiH, ulica [REDACTED], jer je posumnjala u tačnost i potpunost podataka u podnesenom Izvještaju o imovinskom stanju, na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne

funkcije ima zakonsku obavezu izdržavanja-Aneks II, zbog nesaglasnosti između podataka o prijavljenoj pokretnoj imovini u Izvještaju o imovinskom stanju podnesenom dana 15.08.2025. godine od strane nosioca javne funkcije Komisiji za odlučivanje o sukobu interesa i podataka prikupljenih od nadležnih organa i institucija o pokretnoj imovini supruge vrijednosti veće od 5.000,00 KM. Naime, nosilac javne funkcije nije prijavio u Izvještaju o imovinskom stanju pokretnu imovinu vrijednosti veće od 5.000,00 KM, odnosno automobil marke AUDI, registarskih oznaka [REDACTED] godina proizvodnje 2007., vlasništvo [REDACTED], supruge nosioca javne funkcije, a za koje se unose podaci u Izvještaj o imovinskom stanju, čime je postupio protivno odredbama člana 19. stav (1) i stav (2) te člana 20. Zakona o sprečavanju sukoba interesa u institucijama Brčko distrikta Bosne i Hercegovine.

Nosilac javne funkcije je istim zaključkom pozvan da Komisiji za odlučivanje o sukobu interesa dostavi izjašnjenje u roku od 15 dana od dana dostavljanja zaključka.

Nakon prijema zaključka o pokretanju postupka, broj: UP-I-KSI-09-06/25 od 22.10.2025. godine, zaprimljenog dana 30.10.2025. godine, K.J., član Upravnog odbora JZU „Zdravstveni centar Brčko“ Brčko distrikt BiH, nosilac javne funkcije je dana 31.10.2025. godine dostavio izjašnjenje u kojem navodi da mu prilikom popunjavanja Izvještaja o imovinskom stanju nije bila namjera da izostavi podatke o pokretnoj imovini, već da je došlo do nejasnoće u vezi sa obavezom prijavljivanja imovine bračnog druga zbog toga što prvi put popunjava navedeni dokument, ali i činjenice da predmetno vozilo koje se navodi u dopisu Komisije koristi brat njegove supruge, dok je isto samo registrovano na suprugu, te da je u momentu popunjavanja dokumenta smetnuo da je isto registrovano na ime supruge. Na kraju navodi da mu nije bila namjera da prekrije bilo koji podatak o imovini koju posjeduju, te je dostavio Izvještaj o imovinskom stanju sa svim relevantnim podacima o imovini bračnog druga, odnosno podatke o pokretnoj imovini koja je bila predmet ovog postupka.

Uvidom u dostavljene podatke od strane Odjeljenja za javni registar Vlade Brčko distrikta Bosne i Hercegovine, broj: 26-001598/25 od 12.09.2025. godine, utvrđeno je da [REDACTED], supruga nosioca javne funkcije, u svom vlasništvu ima registrovan automobil marke AUDI, registarskih oznaka [REDACTED], godina proizvodnje 2007.

Članom 19. stav (4) Zakona o sprečavanju sukoba interesa u institucijama Brčko distrikta Bosne i Hercegovine propisano je da nosilac javne funkcije odgovara za tačnost i potpunost podataka u Izvještaju za sebe i bračnog i vanbračnog druga, djecu, druge članove porodičnog domaćinstva kao i lica prema kojima nosilac javne funkcije ima zakonsku obavezu izdržavanja, prema stanju na dan kada je izabran, odnosno imenovan, a stavom (2) istog člana, između ostalog propisano je da Izvještaj sadrži lične podatke nosioca javne funkcije i članova njegove uže porodice, uključujući JMB, podatke o funkciji koju nosilac javne funkcije obavlja, dok je tačkom c) istog člana propisano i da sadrži podatke o imovini, uključujući novac, račune u banci, poslovnu dokumentaciju, dionice, vrijednosne papire, obveznice, nepokretnu imovinu, stanarsko pravo i drugu imovinu i dobra u vrijednosti većoj od 5.000,00 KM, u Bosni i Hercegovini i inostranstvu, dok je članom 20. stav (3) tačka b) Zakona propisano da Izvještaj sadrži podatke o stečenoj imovini, o pokretnim stvarima veće vrijednosti, te shodno stavu (4) istog člana Zakona, pod pokretnim stvarima veće vrijednosti, između ostalog, smatraju se vozila pojedinačne vrijednosti veće od 5.000,00KM.

Primjenom navedenih zakonskih odredaba na utvrđeno činjenično stanje, ocijenjeno je u konkretnom slučaju da postoji povreda odredaba Zakona o sprečavanju sukoba interesa u institucijama Brčko distrikta Bosne i Hercegovine, s obzirom na to da K.J. nije u Izvještaju o imovinskom stanju podnesenom 15.08.2025. godine Komisiji za odlučivanje o sukobu interesa unio podatke o pokretnoj imovini supruge vrijednosti veće od 5.000,00KM, kao člana zajedničkog domaćinstva, čime je postupio protivno odredbi člana 19. i 20. Zakona o sprečavanju sukoba interesa u institucijama Brčko distrikta Bosne i Hercegovine.

Član 38. Zakona o sprečavanju sukoba interesa u institucijama Brčko distrikta Bosne i Hercegovine propisuje sankcije za nosioca javne funkcije koji postupi suprotno odredbama navedenog Zakona.

Komisija je, shodno članu 39. Zakona o sprečavanju sukoba interesa u institucijama Brčko distrikta Bosne i Hercegovine, prilikom odlučivanja o vrsti sankcije koju treba izreći u konkretnom slučaju u obzir uzela sve otežavajuće i olakšavajuće okolnosti kako bi izrečena sankcija odgovarala učinjenoj povredi Zakona. Kao otežavajuću okolnost, Komisija je cijenila činjenicu da je K.J. propustio unijeti podatke o automobilu u vlasništvu njegove supruge [REDACTED]. Nadalje, od olakšavajućih okolnosti, Komisija je cijenila da se radi o prvoj povredi odredaba Zakona od strane imenovanog, kao i činjenici da je K.J., nosilac javne funkcije dana 31.10.2025. godine dostavio Izvještaj o imovinskom stanju, odnosno prijavio je neprijavljenu imovinu, i to: AUDI, registarskih oznaka [REDACTED], godina proizvodnje 2007, vlasništvo [REDACTED], supruge [REDACTED], upravo neunesenu pokretnu imovinu, koja je bila predmet pokrenutog postupka.

Imajući u vidu sve naprijed navedeno, odlučeno je da se izrekne novčana kazna obustavom dijela isplate neto mjesečne naknade, koju nosilac javne funkcije prima za obavljanje javne funkcije u iznosu od 10% (deset posto) neto naknade kako je to navedeno u stavu (2) izreke rješenja i da ista u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25. i 39. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

POUKA O PRAVNOM LIJEKU:

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom Brčko distrikta Bosne i Hercegovine.

Predsjednik
Komisije za odlučivanje o sukobu interesa

Admira Mujić, dipl. pravnik

Dostavljeno:

1. [REDACTED],
2. Internet stranica Komisije,
3. Evidencija i
4. Arhiva.